

Kolokium P&P kongsi kepakaran lahirkan Graduan Seimbang dan Holistik



Kuantan, 18 Ogos- Pusat Inovasi & Daya Saing Akademik (CAIC) Jabatan Hal Ehwal Akademik & Antarabangsa baru-baru ini menganjurkan Kolokium Pengajaran & Pembelajaran bertemakan "Towards Producing Holistic, Entrepreneurial and Balanced Graduates" bertempat di Dewan Astaka UMP.

Program dirasmikan Timbalan Naib Canselor (Akademik & Antarabangsa), Prof. Dato Dr. Rosli Mohd Yunus yang turut dihadiri Pengarah CAIC, Prof. Dr. Mohd Ridzuan Nordin.

Menurut Prof. Dato Dr. Rosli, warga pendidik tidak boleh terus kekal dalam zon selesa malah perlu sentiasa memperbaiki diri dengan meningkatkan pengetahuan mereka, meningkatkan kaedah penyampaian mereka dan bersikap up-to-date dengan teknologi terkini sejajar dengan matlamat kerajaan untuk melahirkan kualiti IPT dan sistem pendidikan tinggi yang cemerlang.

"Tujuan sistem pendidikan tinggi adalah untuk memastikan generasi muda Malaysia dapat berkembang secara holistik, mempunyai nilai-nilai murni, ilmu, dan kemahiran yang diperlukan untuk meraih kejayaan dalam dunia yang penuh dengan cabaran dan persaingan."

"Kerajaan sedang dalam usaha membangunkan generasi pemimpin masa hadapan yang mampu melonjakkan Malaysia ke tahap yang lebih tinggi melalui pembaharuan sistem pendidikan tinggi Malaysia yang diperkenalkan dalam Pelan Pembangunan Pendidikan Malaysia 2015 - 2025 (Pendidikan Tinggi) atau PPPM (PT). Pelan ini telah menggariskan 10 Lonjakan yang akan mendorong kecemerlangan berterusan dalam sistem pendidikan tinggi," kata Dato' Dr. Rosli.




Menurutnya, pemilihan tema ini adalah bertepatan dengan penekanan oleh pihak kerajaan untuk menghasilkan graduan yang seimbang dan holistik dengan minda keusahawanan, melahirkan 'penjana pekerjaan' dan bukan sahaja 'pencari pekerjaan'.

Kolokium yang turut mendapat sokongan pihak Jabatan Pengajian Tinggi, Kementerian Pengajian Tinggi Malaysia ini telah diserikan dengan pembentangan oleh Prof. Madya Dr. Jaafar Jantan yang merupakan Pengarah, Bahagian Pengurusan Pembangunan Akademik.

Lebih menarik kolokium turut menampilkan empat orang pemenang Anugerah Akademik Universiti UMP iaitu Dr. Mohd Ruslim Mohamed yang memberikan pencerahan berkaitan topik "Implementation of I-CGPA in UMP".

Menurut Dr. Mohd Ruslim, sistem I-CGPA yang akan mula dilaksanakan di Fakulti Sistem Komputer & Kejuruteraan Perisian (FSKKP) sebagai fakulti perintis pada sesi akademik akan datang menekankan kepada dua elemen utama dalam melahirkan graduan holistik iaitu A-CGPA (Academic) dan C-CGPA (Co-Curriculum/ Capability). Melalui kaedah ini penilaian terhadap pelajar tidak hanya bersandarkan kepada pencapaian akademik semata tetapi meliputi beberapa aspek lain seperti kepimpinan, komunikasi, kerja kumpulan dan sebagainya.

Turut membentangkan kertas kerja, pensyarah kanan di FSKKP, Wan Muhammad Syahrir Wan Hussin. Beliau yang merupakan Pemenang Anugerah Pengajaran Cemerlang 2013 (Kategori Sains Gunaan) berkongsi tentang topik "Engaging with students in learning process".



Baginya, salah satu masalah utama dalam pengajaran dan pembelajaran adalah bagaimana untuk melibatkan diri dengan pelajar dalam proses pembelajaran. Antara masalah yang timbul kerana pensyarah tidak tahu apa yang pelajar mahu semasa kuliah dan pelajar sendiri tidak dapat menyesuaikan diri dengan gaya pengajaran yang dijalankan oleh pensyarah.

Begitu juga dengan pemenang Anugerah Pengajaran Cemerlang 2014 (Sains Sosial) Dr. Nik Aloesnita Nik Mohd Alwi dari PBMSK telah mengupas dengan menarik topik pembentangan "Enhancing Students' Soft Skills Through Active Learning". Dalam sesi ini beliau berkongsi antara cara terbaik yang boleh diadaptasi oleh pendidik dalam membantu pelajar mencapai kemahiran soft skills juga membincangkan sejauh mana sebahagian dari sifat-sifat dan kemahiran pelajar boleh dirangsang dalam pengajaran dan pembelajaran formal.

Manakala bagi seorang pensyarah yang pakar dalam bidang Sains Komputer serta pemenang Anugerah Pengajaran Cemerlang 2014 (Kategori Sains Gunaan), Dr. Mohamed Ariff Ameen telah mengupas dan membentangkan tajuk berkaitan "Learning diversity and big data".

Turut berlangsung forum yang terdiri daripada Pengarah Pusat Keusahawanan, Prof. Dr. Noor Azlinna Azizan, Ketua Jabatan Soft Skills, Dr. Fatmawati Latada, Pengarah Pusat Islam & Pembangunan Insan, Dr. Mahyuddin Ismail serta Pengarah Pusat Ko-Kurikulum, Ramle Abid. Sesi yang dikelolakan oleh Timbalan Pengarah CAIC, Dr. Adzhar Kamaludin.

Lebih 200 orang yang terdiri daripada staf akademik UMP serta beberapa tenaga akademik daripada institusi yang mempunyai jalinan dan kolaborasi dengan UMP seperti Kolej Matrikulasi Pahang, Kolej Matrikulasi Teknikal Pahang, Universiti Teknologi Mara (UiTM), Kolej Kemahiran Tinggi Mara (KKTM) Kuantan, Politeknik Muadzam Shah dan lain-lain hadir menayakan program.

Berita disediakan oleh Juliana Mohd. Ali dari Pusat Inovasi & Daya Saing Akademik (CAIC) Jabatan Hal Ehwal Akademik & Antarabangsa

Posted By : SITI SARAH BINTI MOHAMAD RAJIMI Date Posted : 24-08-2015, 09:35:28